

## **Cusseg pastoral – rapport dalla presidenta 2022/2023**

Cun 7 premcommunicants havein festivau ils **24-04-2022 dumengi'alva** cun il tema «Jesus, nies bien pastur».

La sontga messa ei puspei vegnida embellida cun il chor ad hoc. Quel vegn menaus sco mintg'onn da Rilana Cadruvi Scherrer, uonn cun 25 cantaduras e cantadurs. Suenter messa ha il cussegl pastoral purschiu in aperitiv, cun accumpignament dalla societad da musica.

A caschun dil **di dalla mumma** ils **08-05-2022** ha il cussegl pastoral purschiu in aperitiv a Zignau, Schlans e Trun – sponsoraus da Trun turissem.

Cun gl'augsegner sur Tomasz ed avat Vigeli dalla claustra da Mustér havein festivau ils **29-05-2022** la **Creisma** cun 15 cresmants a Trun. Il catechet Hubert Venzin ha preparau in bi survetsch divin. Suenter ha il cussegl pastoral purschiu in aperitiv sin plaz cadruvi.

Ils **31-05-2022** havein priu tutta curascha ed essan i ensemen cun gl'ugau-baselgia Benedetg Albin si Nossadunna dalla Glisch e rumiau la **stizun da devoziunalias**. Grazia a bunas luvreras ed al bien maun digl ugau-baselgia havein sortiu, schubergiau, pachetau e dumbrau giu tut igl uorden ch'era avon maun. Suenter aschi biars onns era in toc ni l'auter sblihius e rumpeivels, aschia che nus havein lu era stuiu better empau. Ina part digl inventari havein mess a disposiziun a la Casa s. Martin, nua ch'ils cussadents han la pusseivladad da cumprar ina caussa ni l'autra. Engraziel a Corina Petschen per quell'organisaziun. Gl'ulteriur inventari sortiu e cavegliau en scatlans stat a disposiziun per al vendita en baselgia s. Martin a Trun; en la scaffa nova oradem baselgia. La calustra Gabi ha

surpriu la vendita e la responsablada sur da quella purschida nova. Alla Gabi in grond engraziel per quei survetsch.

A caschun dalla **perdanonza da Schlans** dils **26-06-2022** ha il cussegl pastoral offeriu in aperitiv, che la giuventetgna da Schlans e Toni Pfister han organisau.

Ils **24-06-2022** han sur Tomasz ed il catechet Sefan Bolli embelliu la messa da **finiziun da scola**. 15 scolaras e scolars han festivau lur davos di da scola a Trun ed ein semess sin via ora el mund.

A caschun dalla **perdanonza da Zignau** dils **19-06-2022** ha il cussegl pastoral purschiu in aperitiv, organisau da Claudia Küttel e sia famiglia.

Ils **10-07-2022** han las commembras dil cussegl pastoral Manuela Wolf, Gabi Cajacob ed Isabelle Defuns organisau, muort assenza da sur Tomasz, **in survetsch divin dil plaid**. La tematica ei stada “Va e fai era ti il medem”.

Mardis, ils **16-08-2022** havein festivau in survetsch divin per **l'entschatta dalla scola** e quei puspei per tut tgi che ha giu plascher dad entscheiver quei di cun Diu. Tier quella sontga messa ha era la catecheta nova Rilana Cadruvi Scherrer collaborau per l'emprema gada . Ella ei vegnida beneventada alla fin dil survetsch divin cun in pign schenghetg.

Ils **21-08-2022**, in di da bellezza aura, havein festivau la **sontga messa campestra** ell'Ogna. Muort la schetgira dil davos temps eis ei buca stau lubiu da far fiug e da grillar, era buca cun in grill

da gas. Aschia havein purschiu in buffet cun spisas freidas e cun désserts.

A la messa ch'ei vegnida embellida cun cant e musica dallas buobas Eva Luisa, Anna Catrina, Giulietta e Clara Maria cun Clau Scherrer e la Rilana Cadruvi han varga 80 personas priu part. Al gentar sin la piazza da giugs ein rodund 65 personas stadas presentas.

Muort las lavurs da renovaziun ei la **perdanonza da Nossadunna dalla Glisch** stada empau reducida.

A caschun da la **perdanonza da Trun**, dumengia dil rusari dils **02-10-2022** ha il cussegl pastoral purschiu in aperitiv.

Ils **16-10-2022** han las commembras dil cussegl pastoral Manuela Wolf, Gabi Cajacob ed Isabelle Defuns organisau, muort assenza da sur Tomasz, in secund **survetsch divin dil plaid**. La tematica ei stada "Far oraziun".

Las duas catachetas Rilana Cadruvi Scherrer ed Isabelle Defuns han creau in **flyer** per mauns dad affons e giuvenils. Il tetel ei "**Sin via cun Diu, neu e smarveglia**". Cun quei flyer porschan ellas in program per affons e giuvenils, ordeifer il temps da scola. Denter auter vegn purschiu ina devoziun per las **olmas** cun viseta sin santeri, ina devoziun da **rorate** cun spassegiada si Nossadunna dalla glisch ni in suentermiezdi da modellar **parlets d'aua benedida** cun arschella ni era ina **sera da film** cun discussiun. Quei program che cumpeglia purschidas per affons da scoletta tochen giuvenils dil scalem superiur ei facultativs per tut tgi che ha plascher.

Per il **di da suppa** dils **13-11-2022** che nus organisein per ordinari entuorn la fiasta da s. Martin, nies sognpatrun baselgia,

essan i il venderdis el Cafè Tschut a preparar. En quater havein tagliau sco cun lingiala da mordio e suenter ha la Beni Lutz fatg per nus la suppa. Ad ella in grond engraziel per sia grondiusa lavur.

Il di da suppa ein rodund 50 persunas serendidas suenter messa en sala da cultura per guder la buna suppa, las pettas ed era la tombola usitada. Il recav da 1'400 frs. havein schau ir en favur dalla “Scola Tujetschina Nepal”.

Era uonn havein purtau **la glisch da Bethlehem** en nossa baselgia. Las candeilas ein vegnidas messas a disposiziun dalla pleiv per prender la glisch a casa. Spert ein ellas stadas naven, aschia che la purschida vegn veramein schazegiada.

Ils **21-12-2022** havein astgau visitar cun 14 affons dil chor ad hoc da Nadal la **Casa s. Martin**. En ina cuorta devoziun cun ina historia, canzuns, oraziuns e buns patratgs han las catachetas Rilana ed Isabelle purtau in tec tempra da Nadal als cussadents.

Alla **messa da Nadal per famiglias** ils **24-12-2022** han biars fatg part e la baselgia era emplenida. Il teateret dils scolars dalla 4. classa ed il cant da rodund 28 affons dalla scoletta tochen giuvenils gia ord scola han embelliu la sontga messa.

Era uonn han ils **Treis retgs** cantau ils **08-01-2023** sin differents plazs avon baselgias, capluttas e sil plaz da scola. Sil plaz da scola havein purschiu allas persunas presentas, rodund 70, in vin cauld e punsch.

Suenter entgins onns pausa havein puspei saviu porscher ils **30-03-2023** la **messa cun uncziun** dil Sontgieli. Suenter la sontga messa essan serendi el Cafè Tschut per caffè e petta. In

bien caffè e las pettas che las commembras dil cussegl pastoral han fatg, ein vegni apprezzai da rodund 30 persunas. Ins ha gudiu fetg il seser ensemen da cumpignia.

Duront ils dis da Pastgas ha il cussegl pastoral sco usitau **vendiu las candeilas da Pastgas**. Biars selegran mintg'onn dalla biala candeila.

Jeu engraziel a tut ils commembers ed a tuttas commembras dil cussegl pastoral per igl engaschi, alla suprastanza dalla pleiv ed a sur Tomasz per il sustegn.